

MNPA gembira kertas cetak dikecuali duti anti lambakan

OM 13 SEP 2003

KUALA LUMPUR 12 Sept. — Persatuan Penerbit Akhbar Malaysia (MNPA) hari ini mengalu-alukan langkah kerajaan mengecualikan duti anti lambakan ke atas kertas cetak bergulung yang diimport bagi baki kuantiti yang gagal dibekalkan pengeluaran tempatan.

Pengerusinya, Roslina Johari berkata, persatuan mengucapkan terima kasih di atas keprihatinan kerajaan terhadap penerbit-penerbit akhbar tempatan di dalam mengecualikan duti tersebut.

“Pengumuman pengecualian yang dibuat oleh Perdana Menteri Datuk Seri Dr. Mahathir Mohamad adalah amat bermakna kepada industri penerbitan dalam mengekalkan harga akhbar seperti sekarang,” katanya ketika dihubungi di sini hari ini.

Petisyen

Sebelum ini, Malaysian Newsprint Industries Bhd. telah mengemukakan petisyen kepada Kementerian Perdagangan Antarabangsa dan Industri (MITI) agar mengambil tindakan mengenakan duti ke atas lambakan kertas cetak import.

Roslina berkata, dengan pengumuman oleh Perdana Menteri ketika sesi pembentangan Bajet 2004 di Dewan Rakyat hari ini, segala masalah yang timbul sebelum ini telah dapat diselesaikan dengan baik.

Beliau berkata, persatuan sebelum ini amat risau dengan keadaan tersebut dan membayangkan kemungkinan harga akhbar akan naik.

“Kita akui jika keadaan tersebut berterusan, harga sesebuah akhbar tidak akan dapat dijual pada harga sekarang,” ujarnya.

Malah dengan pengecualian duti itu, kos yang tinggi sebelum ini yang ditanggung oleh penerbit dapat dikurangkan.